

蕪江小竹

溫州府圖書館

多江小草

共 | 册 存 | 册 排架号 08845

序

詩境者天地之靈府乎兒時讀北山采杞之什東山零雨
之篇如與鞅掌之征夫銜枚之戰士馳驅於山川險阻部
曲行陳之間漢魏以降篇什滋繁其哀感頑豔而深入人
心者大率行役之詩哀以思而從軍之詩慨以慷降及六
朝而風斯下矣沈宋燕許振於有唐而岑高以悲壯沈雄
爲鏡吹之嗣響然則風塵驛路戎馬關山殆又爲詩人之
靈府乎永嘉王君敬身好爲詩詩多行役從軍之作余遇
之於漳州軍幕中讀其近作薌江吟草若干首如寒夜聞

鷄霜天唳鶴所謂哀以思慨以慷者庶幾兼之矣夫詩者
天地之元音也通之於樂則鼓宮而宮動鼓角而角動其
氣機與運會相乘除願君益蹈厲發揚以作我神州武鼓
文鏡之氣則是詩也安知不爲師曠之清角鄒律之溫風
乎乙亥孟冬遜廬余重耀

序

聲音之道由人心生焉治世之音安以樂其政和亡國之
音哀以思其民困諧聲音以成律發情文而爲詩故讀二
南之詩則知周召之所以治讀小雅之詩則知幽厲之所
以亂如形隨影如鼓應桴蓋有豪釐不爽者人心之感召
然也近日詩人好爲憂愁怨思之作而乏發揚蹈厲之音
曩在海上常與友人論而異之歲乙亥與王君敬身遇於
漳州恂恂儒雅粥然如無能後知其能詩而刻石尤邃於
古其詩蒼勁悲涼多行役詠懷之作蓋蘊蓄有素而偃蹇

寡合亦其境使然也余見其春秋甚富正志士擊楫之年
因以在海上與友人所論者告之頃復示以近作有薊江
小草之刻則又雋永舒夷怨而不怒哀而不傷粹然詩人
之旨余不能詩顧索序於余余惟唐宋大家生當叔季之
世其託興詠物固有瑰奇軼麗之句而一涉時事卽又纏
綿悱惻不能自己唐之工部宋之放翁猶未能免獨晉陶
彭澤當亂離之世處厄窮之境拳拳忠愛不忘祖國而寄
情田園寓意松菊孤芳自賞隔絕人寰絕無膠滯激楚之
音見於行間所謂超以象外得其環中者非歟不以物我

櫻心而融物以養我庶乎發爲安樂之音協成太和之治
君其有意乎古越陳閩

序

詩起於康衢之謠而暢於三百蘇李開五言之先河黃初
義熙壯其波瀾唐初沈佺期宋之間諧聲協律遂有今體
迨杜少陵崛起開寶間乃集其大成焉然而江河不廢代
有才人翡翠蘭苕鯨魚碧海亦有各得其適各鳴其天者
矣王君景遜以軼羣材爲萬里遊郢城懷土賦王粲之七
哀海曲傷時歌梁鴻之五噫甲戌之春與余訂交於龍溪
一時邗江吳嘯園桐城張衡公及棣華蘧廬子林烏莊遂
凡諸君子篇章相質無虛日而君詩獨清厲沈鬱忼慨悲

涼語不驚人意不拔俗不苟出也雖枯題險韻亦必假全神以範之終使淵淵出金石之聲浩浩有江河之勢而後已所謂發天葩於枯槁振古響於寂寥者於君有焉頃以其近作薈江小草索序於余余與君兩年之間契洽特深又烏敢以不文辭長素有言詩者言之有節文者也情幽幽而相襲境嫋嫋而相發情境交鬱變化旁薄故其瀉也有若狂泉鳴也有若怒雷飛也有若驟雨至或情隨境移悲愉異時則又遂韻嗚嗚琴絲悒悒皆其自然而不能自己者殆亦翡翠蘭苕鯨魚碧海各鳴其天者乎吾聞詩派

率宗兩宋勝流遺老鼓吹成風迺畏盧歿庵天遺諸前輩先後歸道山今巋然獨存惟石遺一老睥睨海內若余者荒陬末學窮愁迫人問天多負罪之言卒歲有無衣之嘆酒酣耳熱間復爲南山蕝豆之歌景遜亦輒曰余爲知詩風雨茅齋寒燈共擁相與校論古今儼若有陳無己元遺山之徒與之嘯詠周旋者剗剗觀成因舉嚮之所論者題其簡端冀著佛頭景遜或不以爲迂耶嗟嗟我儕生丁叔世日擊胡塵固未敢上希黃初義熙然而窮者達情勞者歌事其亦小雅國風所不棄乎乙亥中冬海澄陳殘雲序

自序

旅食薈江牢愁綿載出山小草徒寄悲吟客秋以少作付
梓後結習難除間復弄筆而舊雨同岑時更以篇什索和
數月之間累稿凡七十餘章自奉先君之諱吟事久廢
泊乎夏末秋初始稍稍復爲東野苦語塵絃重拂悽惋益
深其間亦得詩四十有八篇遂并前作纂爲此帙折楊皇
琴忘其鄙陋世有大雅得無叱爲傖父而覆之醬瓿也乎
乙亥孟冬敬身識於漳州

火江南動酒悲

簡徐飛仙詞宗

薊江有客神仙侶籍籍天池姓氏標心史千年翻水國

開某縣曾

聘先生 霸才一代領風騷玄亭酒畔餘奇字白首豪端有怒

濤末學永嘉嗟小子龍門咫尺仰彌高

偶懷蘇臺彭城舊遊有作

過江山色認勾吳虎氣宵騰古霸都一塢紅雲傳畫臺千

年碧血壯屠沽穹隆松柏迷先塚

余家世為吳人諸祖塋皆在穹隆山自家君宦浙後遂籍於永

笠澤萑

苻叱畏途臺畔垂楊應有語倘教來作首邱狐

08845

戲馬臺荒夕照微雲龍亭在鶴還歸墓前秋草思撞斗樓
上春雲想舞衣自古地形供戰伐偶懷遊跡重悲歎依然
癖苦陳無已閉戶高吟百計非

距漳城二十里木棉庵在九龍嶺下宋賈似道死處

葛嶺蟲聲驕襄城礮聲厲江水灌南朝神姦走漳瀉燃臍
留餘腥蠻花紅滿地

奉和澹風先生七十述懷元韻二首

七十年來自在身杜陵芋栗未全貧天寬歲月供吟卷花
帶秋光上墊巾玉杖扶鳩知健飯瓊杯浮蠹足芳春書城

自可傲南面不遣輕投渭水綸

少自昂昂老自休蕭然高詠謝時流塵中蟣虱憐湯沐眼

底江山足臥遊屈子九章看獨醒放翁萬首定千秋先生作詩甚富積稿

至三萬餘首祇慙作賦樓頭客風雨蠻鄉尙滯留

補和澹老夏五見懷元韻

回首匡山媿謫仙支離蠻府負鳶肩轉教月黑千重意寫

上雲藍一尺箋舊雨黃花懸故國炎風丹荔落南天詩成

補寄情無那望斷蠻江暮靄邊

一昔夢至南昌重遊百花洲見樓觀斬然喜而有作

覺來隻字不遺遂錄於此

幾年不踏豫章路不道重來事事新泥雪未堪尋往迹干

戈且喜息驚塵乘時鷄犬來天上照眼樓臺問水濱獨愛

東湖幾樹柳青青猶戀舊時人

無題用東坡天際烏雲帖諸詩韻

百劫窮塵餘涕淚十年舊夢欠分明病來摩詰風懷減一

著天花便有情

鏡裏鬢顏兀自驚亦知病鶴解梳翎青邱儘有麻姑爪塵

土無端老蔡經

闕氏血淚雁來紅一片秋心萬古同誰識寒江殘照裏芙蓉無語倚西風

天樓郵示喻君水聲幽叢小憩圖題詞四章次韻却寄

買得淵明種秫田茅亭新縛著神仙炎炎夏却扶桑日嬾嬾秋生籠竹煙煤鶴風情歸小隱龍蛇慘澹讓高眠懸知抱鄴長吟地祇許閒雲過眼前

本來痼疾有烟霞放眼空明絕俗譁短褐祇應隨射虎折腰倘亦爲澆花流泉瀉澗鳴寒玉小陣翻空點莫雅獨媿

蠻江兵火裏酒酣題句字多斜

料應詩外更無耽禪味閒參向碧灣一徑煙雲摩詰宅數升水墨米家山沙蟲無意論塵劫鷗鷺忘機任往還倘許白衣常送酒柴門雖設不須關

一椽且傍鏡湖東無復封侯到夢中十載江關憐下走數章珠玉見高風畫圖爪雪看同誌文字心犀想早通爲語髯翁詩句好菟裘祇在竹千叢

蝴蝶墓二首有序

蝴蝶墓者明時漳州太守錢唐梁公女墓也以形似

蝶故名女幼秀慧攻詞翰未嫁而卒葬於芝山之麓
 玉樹埋塵過者隕涕厥後時著靈蹟傳為女仙嘗降
 乩於某士人家積詩成帙好事者為之付梓題曰北
 山詩存偶於殘雲處檢讀之雖稍覺穉弱而幽思纏
 綿惻然動人地下傷春亦可哀己因書一絕於卷末
 荒郊戰壘陣雲屯宿草空山冷墓門賸有當時泉鞠意殘
 陽樵牧話黃昏
 離魂蕊府說歸真幽淚閩山思所親應是蠶僵絲未盡尙
 留斷句落紅塵

壽林次煌太史七十代作

誰言七十人間少萊舞今看舉壽觴開寶文章歸稷契先生自壽

詩有亦願許身為稷契之句 乾嘉風雅接彭汪譚茶陵嘗言先生倫生於乾嘉之世則宏獎風流與彭文勤汪文端同為名公卿矣 木天待

詔清名在花縣迎輿老福長料得掀髯應一笑馬頭詩筆亦堂堂

與小顛祕書

捫虱天南我自憐偶傾肝膽識為肩一官佐治牛刀小四海論交鷗夢圓酒盞辟塵須更盡吟箋有淚倘同傳鼎鍾無與人間事合把頭銜署小顛

鳳隨鴉并引

曩與印懷以所見人爲可悲擬作鳳隨鴉曲塵務櫻
 心迄數歲未嘗下筆蠻居鬱鬱頗涉遐想因追成之
 四座且勿譁我歌鳳隨鴉東鄰有靜女顏色勝朝霞當戶
 能織素染翰妙簪花佳人高義薄金夫麗質幸天落端儉父
 五載姑茶齏甯謂妾心苦女手自縫裳糟邱踞暴虎歇浦
 迴舟甘寂寞五陵年少空相逐早判么鳳此身輕肯信乘
 鸞再世卜侵曉時聞搥楚聲路人駐足雙淚零兒何薄命
 彼何獰吁嗟乎鳳隨鴉鳳隨鴉莫再歌一歌再歌奈尔伊心酸麻

薌江歲暮咏子琳

相看島瘦與郊寒漳水西風逼歲闌時序真同飛鳥去行
 藏祇檢舊詩看王尼滄海牛車穩李白青天蜀道難一笑
 尼山今不作中行狂狷各無端

嘯園以五十述懷詩索和敬次元韻呈政

豈真今是昨皆非自是高懷與俗違閱世終難消孤憤論
 詩那復恤羣譏鄭虔三絕聲名重東哲平生祿養微直使
 謫仙肯低首登壇先報謝玄暉嘯園滄嶂小願先以文介
 才老英風高一代馬卿詞賦入中年兵戈共歷龍潭劫龍潭之戰

走亦與
其役

文字初聯蛋海緣冠掛賸携靈運屐囊空甯看少陵

錢輞川圖就齏鹽辦老去惟參畫裏禪

添籌真見海生桑况復沙蟲過戰場夢裏河山蟻作穴愁

中薜荔雨侵牆東皋登嘯飛天籟南國行歌動大荒肯向

浣花分一席吳家壁壘自堂堂

冰霜梅福神仙尉落落乾坤歸去來思入豪端呈萬象春

生甕底倒新醅同聲蓮社攢眉入隨喜香山笑口開獨媿

軍中揮秃筆平淮長負勒銘才

不寐口占

客睡何曾著寒燈故故紅風簾生瘴霧冬夜叫秋蟲旅食
落江上孤吟起枕中文章慙短李應負萬夫雄

舍弟慧生以醬鴨寄我因買酒招子琳同飲爲二截

句

故山迢遞路三千鄉味殷勤寄阿連一濁鉢似醪倒易盡又

傳離恨上吟箋

招得詩人共酒樽繩床姜被想同溫漫矜鸚鵡善題賦却

鵲鴿長在原

次韻棣老元日之作

海色春光又一年等閒莫放雪盈顛放翁別有胡塵憾鐵
馬關前思著鞭

殘年剛賦送愁詩又寫春陽動酒悲冥想神仙成脈望千
山風雨夜深時

雨中作

興來欲有作苦思漸成甘一雨忽霽霏千山淨瘴嵐此邦
多奇跡何日足幽探應媿眉山老風濤挾海南

歲暮懷人十二首有序

橐筆炎方勞薪綿載寸心木落百感蓬飛懷吾土兮

天一涯思故人兮月千里况逢歲暮倍切離憂聊賦
短章藉當尺素

越王臺畔別經年北望長淮一黯然安得廣文無惜墨長
飛好句落蠻煙

谷黃侯

霜隕園林老鞠黃閒拈健筆寫秋光落英自足先生饌慚

媿江湖覓稻梁

楊浚風

當年眷顧寧相負幾度蠻荒發浩歌聞說玉臺徐孝穆香
爐落日看銀河

徐建三

劉毅呼盧百萬輕當年狗馬負狂名燕臺歸日雄心冷風

雨蕭齋臥短檠

劉印懷

石城飲水餘殘淚江漢題襟又隔年
亂後梁生知有母泉橋賃廡劇堪憐

蔡禽父

錢歲西湖憶苦吟酒盃冷暖總關情
年來之子風流甚聽鼓樓頭擁百城

單伯暉

王母泉邊臥酒家秦松漢柏幾摩抄
金陵渡口難爲別欲

上鍾山望永嘉

簡漸鴻

細數忘形有幾人半生憂患最相親
關山走盡名心了一

卷靈樞獨耐貧

項鄰松

愛寫香奩亦有情前身應是玉溪生
長門狗監知誰是犢

鼻臨印憶馬卿

吳次園

臨分贈句長相憶惆悵寒雲隔
枯蒼曾許論詩惟我契一

壺苦茗坐空堂

徐聞鵬

酒酣落筆亦蒼涼憂可傷人念孝章
料得郭公山下住朔

風如虎惱詩腸

胡子耀

一二子讀書還讀律平生骯髒少人知
安得華胥成酒國盡

除繁法寫新詩

胡星洲 曾伯明

天僂民歌贈子琳

章子琳天僂民學詩愛杜甫往往得其神白描不欲假脂
粉出語常見性情真長鯨日日吞江海君豪於飲却笑區區徒虞
溝壑身黃塵一別六七載海南相見意倍親大筆淋漓搖
五嶽爲我題集詞振振人事滄桑隨轉燭胡爲吾子怏怏
復踈踈乃知孫劉許史非宿好文章有價終無因魑魅窺
人大道息且沽斗酒相勞發吟呻吁嗟乎章子琳天僂民

寰生世兄花燭詞

竹馬青梅到百年蠻江春色照鸞駢驚鴻獨愛凌波影自
理新粧傍水仙

郎君年少氣如雲奮筆鄉邦見立言待咏二南好詩句平

添韻事入輜軒

寰生近在商音編輯部襄筆政

閩中一丈紅卽蜀葵也

紅紅一樹似辛夷霧裏遙看倍有姿應是蜀山杜宇血夜
來灑上最高枝

書王荊公萬言書後

萬言一策原經世那識青苗是孽錢爭得謝家三尺土依
然捫虱挾書眠

棗花雜興

鐵骨吟來字有稜冰容看去絕纖塵夢中不辨揚州路腸
斷蠻江一樹春

三春漫有牡丹姿欲買燕支已恨遲輸與林逋多奇福暗
香疎影定情時

水仙曲

水仙花國之香生南海銷重洋女貞羞嫁小閨王化爲小
草民寶藏

絕句

三歲蹉跎滯舊京胡塵滿眼氣縱橫峨眉不葬英雄骨肯

向江南躍馬行

聖湖回馬向神京一舸鴟夷未忍行竟使尙書有殉妾樓
頭碧血濺傾城

題龍溪先賢鄭亮卿先生詩卷

款段鄉關鄭祭酒脩然歲晚獨冰心生當盛世安邱隴氣
壓騷壇耐縱擒七澤鳴鏡歌草野六宮懷古動蕭森

集中有秦楚漢晉隋

唐六宮懷古詩那知庾信傷漂泊烽火南州涕淚滿襟

漳江除夜

又是一年去栖栖在漳塵失眠非守歲得句總先春弟妹

團欒思朋交酒盞頻誰能破積習日氣看明新

乙亥廢歷元日余年三十一

湘鄉曾公曾有語年過三十詎足謹我忽憶之顏汗下奚
須柏酒敵春寒風塵失歲從人罰筆研能貧且自安揮淚
祭詩餘昨夢半生蹤跡在泥蟠

閩中紀事

百戰戈初息遺黎喘未舒山林拔狐鼠鐘鼓事爰居應識
官家意終期民患除海濱春浩蕩佳氣待充閩

夜坐遣興

陳跡回頭類轉蓬窮愁難化孟郊龍夢中舊侶如烟幻燈
下枯容借酒紅遼海夕烽驚務觀蠻江春水黯文通何時
真買青山屋一枕袁安風雪中

嚮藏十年磨劍圖其上前人題句甚夥讀之殊少快
意者因自擬一律

淬礪亦已久光芒每吐奇幾年遭胡羯萬里入瘡痍此恨
將誰雪孤懷儻爾知淚痕隨水赤甯計手傷時

感事

歷數舊交多困頓响濡仍媿欠身謀江湖相忘知何日泉

湘同深處陸憂

讀朱天目先生見乎詞竟繫以二絕

閒情老去轉悽悽短燭蠻牋掩淚題
一樣風懷朱秀水讓
他兩廡食豚蹄

兜率宮成離恨天西山石盡海難填
溫柔二三百風人旨合
與紅兒句並傳

戲咏裙帶魚

佳名才喚便銷魂瘦損鮫宮一榻寒
只合與人供大嚼何
曾因汝得微官驚濤海上飛霜鏢
旅食天涯薦玉盤夢到

鱸羹應媿死三年憔悴學南冠

宜之君嘯園先生高足別署邗上閒
鷗襄晶報筆政
有年來漳逾月相見於殘雲座上如夙驩
者旋爲長
句以贈

吾宗逸少足風流忽漫相逢在遠遊
才調黃初推繡虎聲
名邗上著閒鷗一燈風雨鳴詩卷左海鶯
花豁醉眸難得
揚侯能接席更紆餘緒付陽秋

友人送武夷佳茗賦此答之

龍井鳩坑味比清不勞乳酒送青城
花瓷他日憑軒坐合

有新詩照眼明

鄉江春日雜詩

江頭日暖燕低飛
春到蠻花旋滿枝
獨愛清狂陸務觀
不將吏事廢哦詩

眼中章子最相親
七載炎荒墮瘴塵
祇此便爲天位置
千竿翠竹住詩人

人間何處武陵源
十里紅雲江上村
幾度欲行行不得
彈丸無力打遊魂

盡刪哮虎跳猿性
來雜寒蟬仗馬班
落日空樓耽靜坐
眼

中時復見芝山

紀事

三年拔幟掃黃巾
毒霧巉巖百戰經
安得扶桑標銅柱
樓船海上見雲旌

絕句

鼠腸三吐欲如何
牛鬪中宵戰蟻多
自笑行藏何足似
十年兵火一頭陀

奉題甘祕書芾如兄小照並次元韻

瘦竹寒梅莫浪猜
幾年骯髒簿書堆
聊從世國清流裏
一

現廬山本相來浩蕩離愁生去日蕭疎短髮識長才病餘
自媿詩情減懷抱因君得暫開

別二劉

永嘉二詩豪騷壇嗣絕響探驪讓夢得

懷才老

長城峙真長

蕭鉛

華謝時流風雲生落澆平生鮮許可獨予喜翫麟論交或
後先情好固無兩賤子早饑驅江湖成獨往今春天柱折
嚴君悲棄養勃卒返故廬唁弔紛我黨二子意獨溥深談
日暮聚導以禮之門語以孝之矩生憎塵事迫蠻瘴復踣
蹶執手各踟躕離情滿江滸傷哉中年別况余情更苦安

得買山錢將母白雲邊飲子一勺水噫子五噫篇

送閒鷗歸邗上

王郎何卒卒孤劍返長途白髮縈歸思驕陽怯病軀勞生
同濩落飽死讓侏儒息壤應無改西湖卽鑑湖

楊澹風先生挽詞

叔世風雅歇繫誰憤獨切傀然楊園老長鯨赤手掣苦吟
五十年未改處士節篇章累三萬曠古殆無匹豺虎當塗
擁風塵悲頌洞我昔金陵回懷詩龍門踵抗心希漢魏忘
年契襪孔客歲從征寇方公七十壽八詠介南郵莫作一

觴酒以公獨嗜痴令我忘其陋嗟嗟今年春奉諱歸里門
瞻彼羅含宅但有黃花存思親復感舊惻惻摧心肝念此
正聲息大地猶狂瀾豈徒哭其私正以悲斯文

和印懷過壺嶼樸園弔鄭成功故壘元韻

陟岵蠻荒事事哀此時懷抱向誰開畫圖萬柳傳邊政風
雨孤松弔霸才隻手孰迴黃冑厄一椽總負白雲堆山林
樽俎同惆悵賸寫幽憂付酒盃

呈余鐵山前輩

吾愛余夫子談詩不論官戴石屏句烽煙消赤幟顧問備黃冠劬

學逾年少耽禪識道寬亂離傷孤露墨經疚心肝

讀印懷江東風味記書後

虎渡何年得此名橋東萬柳似層城吾家亦有鱸魚膾一

舸秋風百感生

晉邑上鄉新橋亦產四鯽魚

早秋書懷和濟白

病骨初蘇百感興新詩入手氣如蒸平交幾輩成翻覆多
難何時異愛憎猿鳥悲秋同作客齏鹽隨分欲依僧天涯
皓首看潛涕倘許能文一自矜

水上

美有魚蝦號呈身水上游孰憐漂沒者一樣在洪流

秋風乍起感成五十六字所懷萬端不盡其一

風埃十載耐愁嘆爾志如何總未安多憤豈因經世淺少
眠祇爲作詩難依然負米來千里無復將車望一官萬卷
丹黃存手澤秋風回首涕沈瀾

聞龍巖鼠疫甚盛死亡相繼詩以哀之

大兵之後大疫耳厲氣所召固應是獨看多難哀龍巖賊
氛未靖疫氛起鼠疫不見長沙書劉李朱張亦無此一核
蠕蠕著胯間患者十人八九死我聞其地一月纔四百生

人先後鬼道上惟聽哭泣聲城中非復繁華市難將奇疾
責中醫西國藥苗亦安恃大府空懷惻隱思何奈良工技
已止君不見城狐社鼠滿人間磨牙吮血同兇頑側身西
望空愁嘆

次韻黃仲琴

嶺表官還未改貧頭銜端合署詩人青山抱鄴消塵夢白
首論文見性真餘事蟲魚繩絕學惱人鵝鴨漫比鄰恆河
觀面應猶是一任繁霜兩鬢新

也曾仗劍渡黃河眼底蟲沙萬劫過未信名山非大業微

癸江小章
憐易水有悲歌殘宵燈火紛秋思百歲光陰半墨磨我亦
蠻居惟泥酒十千那惜醉顏酡

乙亥中秋漳州軍中作

莽莽兵戈尙未休南來兩度見中秋懷人亦苦中年別思
母真同失乳憂會看全圖刪北鄙賸憐圓月照西樓蠻江
倘有飛鳶跼應媿平生馬少游

蘧廬將北歸輒作四詩爲別三年同舍一朝遠離不

自覺其言之傷也

歸去青山有白雲不堪兵火賦離羣東方早自甘飢死割

肉還憐爲細君

曾共黃塵憂患長那知舉足有滄桑駑駘我亦終疲路慚

媿天閑芻豆香

癡念年來已盡刪長貧總覺拂衣難杜陵襄洛從容去畢

竟將軍禮數寬

難憑文字藥飢寒我輩原同蟣虱看十口盡行君莫難無

官今得夢平安

次殘雲中秋生朝元韻

天遣窮愁知有意好將詩事畀吾曹每憂舜水歸三島何

用安仁嘆二毛獨醒微聞仇木鐸羣陰坐令啞蒲牢特商音已停刊
庚寅例有讀騷飲君生於庚寅起弄澄空大月高

隨感

亦苦身爲贅應知道益難秋涼容睡足人瘦覺衣寬戀棧
吾滋媿無脣齒早寒獨憐陳仲子并李未饜餐

寄題會稽鮑亞白江村詩思圖二首

水竹重尋老學庵丹青秋色寫江潭脫眉入甕渾閒事甘
苦年來倘自諧

箕豆南山嘅久蕪醉吟聊自起嗚嗚天涯兵火愁王粲愛

汝菟裘有鑑湖

晨興口占

晨風涼動竹晴霧薄藏山專壑何年事脩然思故關

喜建二至

等閒已是二年別今日炎荒喜足音萬里相看仍故我一
尊端爲發高吟秋風海嶠遲黃葉壯歲塵埃賸素心道汝
香爐峯下住筆端應有瀑千尋

落葉

一夕西風緊庭階落葉平淒涼辭老樹寂寞逐漂萍團扇

離宮淚孤舟故國情秋蟬苦風露爲汝作哀鳴

九日寄印懷

秋風南國見黃花何處登臨足嘆嗟一念寒家橫涕泗幾年病骨抗塵沙漸教鳩舌通蠻語賸欲蟲鳴感物華眼底劉郎天下士可無樽酒慰天涯

秋興

壯心苦自耗論千年何日揚雄足一塵眼底朋交行欲盡夢中骨肉見應憐叢蘆野水明殘照落葉寒廳聚暮煙惟有后山言可念登高懷遠總淒愁

疊九日韻酬眉生

鄉愁萬里動黃花攬鏡頭顱時一嗟何日棲邱容煮石幾年雕句費搏沙但教吾道永如日肯信胡塵能亂華佳會藍田叨末席是日曾與眉生商詩鐘小集看莢作健遺生涯

書鄉前輩劉貞晦先生題畫詩卷

詩筆吾鄉此老奇白頭去臥滬江湄草蟲絕句多孤憤想見揮毫落紙時

獨傳

曼衍春明雜戲陳鼓詞一首最精神直攀漢魏堪方駕肯數楊家樂府新

奉和垂老自嘲元韻

萍瀆風雲倦眼過。苦雕肝腎學陰何。晚年歲月連城貴。亂世文章敝屣多。寒賸一甌容偃蹇。早藏五斗足消磨。比來常作玄亭客。起寫秋聲當壽歌。

乙亥生朝作

著我人間又一秋。無聊生日賸詩酬。飽溫竟作平生志。人物甯論第幾流。覆瓿有文還自賞。移床無夢獨離憂。杜陵冷被溪花笑。吏隱依然類楚囚。

聞子琳卸區政父老羣送有垂涕者因爲一詩以贈

讀書原爲行道計。吾子而今始見真。苦恨當時多謠詠。青蠅半是故鄉人。

蠻村父老同垂涕。臥轍終難挽使君。願借此時重刺股。百城儲作出山雲。

近爲嘯園製邗江吳氏小印一紐。余得意君亦激賞。遂有此句。

君不見杜老文章寸心得。失自千古放翁書法公論欲。期五百年區區作印安足道。何圖真賞在眼前。賤子苦吟歷寒暑。壯夫雕蟲頗自憐。豐碑欲向曹江臥。殘石還摩泰嶽

巔君家讓翁真好手氣壓丁黃名世久敢持布鼓過雷門
轉嘆千金珍敝帚詩成夜半飢腸鳴垂首書叢吞蝌蚪

送衡公之漳浦卽次其留別元韻

寂寂悲生事勞勞逐雁賓敢期三釜祿又是渡江身失侶
知君苦投詩見我真何時釣竿手長共五湖濱

和嘯園殘鞠元韻

漠漠寒香著短籬眼中猶賸傲霜枝秋叢殘淚餘他日白
髮清樽悵此時頗憶落英繁戰骨盡驅孤憤入哀詩北山
倘有閒薇蕨二徑歸來敢恨遲

吾鄉楊澹風先生早耽章句白頭泉石種鞠自娛雖
足不越里門而詩名籍甚余少年學語頗辱真知今
先生已歸道山提命無從偶檢行篋得去夏見懷手
稿感念前塵不知涕泗之橫集也

海內爲長句鐵厓異小家斧斤遺驥子滄海賸牛車二夜
夢無賴百朋意有加塵埃嘆蟣虱悲淚向秋花

與林瑄玉

脩然樸鶴入高吟歲晚滄江寫素心塵裏看人常白眼尊
前脫手卽黃金駐顏有術春長在

君年總知命未見二毛

夢草無詩感獨

深今日摳衣遲下拜揮毫聊復續題襟

得鄉書知遠峯先生歸道山愴然有作

剛逐歸雲哭土龍又傳木稼隕長公老居鄉國文章伯早
踏西南山水雄香火黃冠依佛座夢魂黑塞渺秋風當時
倒屣孤深意悽絕遺篇在枕中

十月十五夜望月眎印懷

一生幾見月當頭又向清漳照客愁白露宵分鴻雁影銀
濤寒擁海山秋紛紛牛李成孤注擾擾裊瀛說九州却憶
三年前此夕九山喬木接清遊

論詩絕句六首

殘雲近作論詩絕句頗多奇警中肯語戲效其體

思潮起伏祇匆匆命意驅詞忌俗同信手拈來裁翦穩雖
然天籟亦人工

苦裏真甜語信然縐眉燈下聳寒肩尋常語助難安置也
廢繩床一夜眠

法唐擬選亦無端水到渠成自可觀箇裏要存真面目莫
教徒著古衣冠

俳體而今最擅場羣公才大本無傷安身儘有吾曹地不
向中郎較短長

陳言務去推韓杜萬卷撐胸吐屬精不信有人論解放五
千年獨爾聰明

醒目全神一字爭宮商調好莫喧轟人間自有真詩在論
日何妨作二盲

寄懷劉肅平山中兼簡胡星洲老友

世事悠悠付弈棋劉郎老去愛哦詩廣田自有硯可食東
閣愁看春在枝莊墨丹黃徂歲月風霜襍被嘆支離城中
亦見韓非在爲說江天有所思

鷄鳴詞

燭跋茗猶溫譚深忘夜半臚膊兩鷄鳴催眠復戒日

編印斷手感而有作

寂寞梁園客高吟出肺肝甯論家數小終見苦心存魂夢
愁天末風濤幻海門書生無一用聊此答乾坤

温州市图书馆